

青山集卷第三

當塗郭

祥正字功父

長句古詩三十三首

寄獻荊州鄭紫微

毅夫

李白不愛萬戶侯但願一識韓荊州荊州太守古來
好至今文采傳風流鄭公辭賦天下絕殿前落筆鏗
琳瓌相如嚴謹返枯澁宋玉爛熳隣倡優卓然風格
出天造冰盤洗露銀蟾秋麻衣脫去未十載寶犀飾
帶魚懸鈎道行言聽遇明主皂蓋朱轡寧久留渚宮
風物最蕭洒酒蒲金壘誰獻酬公嘗愛我似李白恨

不即往從公遊醉看舞袖卷明月夜聽長笛臨高樓
詞源感激瀉江海筆陣頓挫排戈矛駑駘蹇蹶固已
困勉之尚欲追驂騑一朝公歸坐廊廟致君事業如
伊周門闡從衛愈嚴密是時願見應無由行當投印
佩長劔夢魂已附西江舟

姑孰乘月泛漁艇至東城訪耿天騫

姑孰望東城長江八十里思君半夜泛漁舟明月隨
人渡寒水江南美酒君家無携來相就傾一壺澄江
如冰月如玉拂拂清風生碧蘆功名無成安足嗟但
令方寸無疵瑕煉丹辟穀亦瑣瑣萬物何處非生涯

君不見鴻溝欲將天下裂失道陰陵遽身滅玉帳周
遭皆楚歌金甲繽紛摧漢鉞重瞳却傳繪塑手瓦鼓
巫歌薦神酒廟前老木藏訓狐豪氣英風亦何有沉
吟往事君勿悲我曹幸遇堯舜時田中穀稔牛羊肥
高會難逢易別離今宵不醉欲安之

西山謠寄潘延之先生

男兒無成羈薄祿日月相推猶轉轂誰向生前悟此
生西山山人掛冠速買田築室臨西山時來石上橫
琴彈千古萬古治亂事一曲兩曲頓挫松風寒門前
禾熟醞美酒故人車馬留盤桓祭亦不足貴辱亦不

我干但願青山綠水兩不變醉醒自得窮觀玩名落
人間非所欲閉門且喜辭憂患君不見李太白朝爲
酒家仙暮作金鑿客醉裏題詩宮妾扶自謂遇君今
古無一朝讒言入君耳夜郎遠謫吟魂孤到死空言
竟何補何如道行及妻子西山人孰可比晴空矯矯
孤雲飛欲往扳援無路歧

上趙司諫

彈劍思經綸悲歌負陽春逢時不自結明主空文亦
是尋常人君不見太公辭渭水謝安起東山日月再
開天地正龍虎感會風雲開又不見屈原澤畔吟離

騷漁翁大笑弗舖糟可行則行止則止胡爲憔悴言
空勞夫君之名振朝野道行諫聽逢時者南州豈足
舒君才天門夜詔星車迴紫皇之真人造化無嫌猜
往將和氣輔舒慘不令地下萬物同寒灰功成收身
彩雲裏坐酌千觴浮玉藻麻姑王母相經過醉來共
泛瑤池水樂亦不可盡名亦不可窮願學李賀逢韓
公他日不羞蛇作龍

贈張御史公遺

我愛張御史酒船打拍浮音伏欲邀天下賢盡向酒中
愚世人雖飲酒只知酒味不知酒意胡爲乎又聞夜

歸東海頭撫掌喚月當金壺須臾蝦蟇蝕月黑公起
磨刀代天誅蝦蟇吐月入地走玉兔還家桂樹不枯公
方醉卧常娥驚呼且語東方蒼青龍遲遲推出赫日
車自然月光不滅公飲不徹是時應笑高陽徒

贈提宮諫議沈公立之

神仙之府名雞籠千尋翠玉擎寒空秀色凌風入城
郭半銜曉日金濛濛賢材間出萬人傑行脫麻衣趨
紫闕三朝出入持使權凜凜聲名洒冰雪往年作鎮
來金陵天子臨軒宣老成問公書畫幾萬卷品秩入
奏編瑤瓊延閣往往未嘗有詔扎獎與光華生僉言

公歸坐廊廟易節暫刺玄暉城懇請仙宮遽知止車
蓋翩翩還故里粉娥執樂四時春窈窕芙蓉新出水
嘈嘈絃管鸞鳳鳴玉卮獻酒公解醒人生快意似公
少家園乃是真蓬瀛數峯飛來雲霧濕琪樹玲瓏曉
寒入綠池水照百花明芳亭小樹佳賓集有時自賦
歸來篇幅巾藜杖詩中仙秦晉諸子因避世種柳栽
桃安足憐願我登門二十載貴勢能忘竟相待數奇
自笑無所成亦欲浮舟往滄海滄海雲濤人不爭忘
機可以超神凝比公進退殊未足若問逍遙無鷓鴣

贈孫郎中景備

江潮夜漲北風惡雙槳喜逢溪岸泊桂陽史君賢故人借問慇懃吏來數浮橋傾危暗難渡靜枕不眠聽曉角平明白笑僕乘無破帽赤髯行蹉跎袖持漫刺前起居屢嘆窮愁手頻握嬰兒連死瘦妻卧病骨尚遭讒啄啄壯志消盡同寒灰生事無涯委藜藿男兒有命何足論斗酒貫衣評舊學愛君新篇溢千楮突兀寒霄見南嶽龍蛇千丈老松杉霹靂一聲揮電雹豈宜偃蹇處郎曹固合逶迤步臺閣天子聰明繼堯舜廟堂論道皆伊霍拔茅連茹收時才尺寸高卑應不錯君馳身路鷄橫秋我困汗泥龜縮殼

贈張參軍 待舉

宣城之人張待舉高才未得見明主強將樽酒娛天真猶得狂名落寰宇陶陶復陶陶意氣蛟龍豪滄溟豈是遠銀漢不爲高路逢郭子陵陽津平生未識如故人相歡握手輒大笑共訪瑤池尋玉真天門夜叉識慮惡爲我無錢謹關鑰興闌却駕彩雲歸別入紅窓共君酌醉來兀兀乘扁舟長溪水碧芙蓉秋願逢萬丈龍鬚蓆卷取月明歸玉樓

贈彭明微判官

昔謁公家賢侍郎一見許我能篇章俸稜兵酒屢特

送時時解榻令登堂令喜清風傳令子回首身衢脫
雙屐北堂歸養太夫人水陸珍羞稱甘旨深沈大第
蟠虬鱗兒孫藍綬何詵詵有時宴喜列賓客洞房粉
黛桃花春玉指纖纖拂絃索輕雲凝碧羅衣薄主人
快意妾爭妍松上女蘿知有託君不見景太傅殺身
本爲功名誤又不見張舍人朝爲近侍夕爲民古來
寵辱亦如此安用浮雲纏此身愛君進退真得所不
負青春領歌舞我方兩鬢撲黃塵夢寐江南思舊土
別君去將拂衣扁舟若渡歷陽月願聽新歌酩酊歸

贈陳懶散

懶散翁何怪竒形容磊落似元亮情性孤高如伯夷
靈臺瑩徹軒轅鏡妍醜默辨毫與釐生涯只寄一壺
酒萬事掉頭予弗知或乘爛醉說儒佛風雲坐上騰
蛟螭顯晦自任不可測頭角變化將有時驚人一鳴
沖天一飛豈能齷齪事小隱堯舜君日方有爲懶散
勿懶散石渠金馬須翁來

贈舒州李居士 惟熙

李居士存心最慕韓伯休州城賣藥不二價世人求
我我何求顏如渥丹眼如漆和氣酣酣吐朝日偶來
握手爲一言照盡五臟平生疾篋中自取三粒丹瘦

骨坐使春陽還便當投印棄冠帶與君海上巢名山
深鋤茯苓釀濃酒極飲形骸可長久乘槎鼓枻入雲
濤醉放一絲携六鼈

謝杜倅職方兼簡湯史君

李白昔遊宣城時誰爲太守賢相宜掣鈴交通喚六
博壯哉意氣凌虹霓北望樓高氣象古遺風餘思猶
依依我來正值青春半雜花爛笑禽爭飛輕煙繚繞
淡白日細風蕩漾吹遊絲高樓簾卷舞袖出百尺欄
干橫酒旗銀鞍白馬不知數龍箏鳳管相追隨杜陵
遠孫駕別乘恩威得所名聲馳華堂重構喚賓客風

前共倒黃金卮我爲下客最踈放辱君許可能文詞
死生寅緣釋氏說但覺時換名姓非寄言太守勿感
感共對佳人花下迷莫教流水落花去空聞暮雨哀
猿啼

謝劉察推

莘老丞相

秋風吹霜入松栢虛谷聲遙寒刺刺月華正高星宿
稀獨鶴不鳴嘴插翼是時夫子爲我吟逸調雄才世
無敵十年學詩自謂豪一日逢君有慙色恍疑醉夢
太帝家寶藏珠樓不知極蟠桃結實九重春金銀琅
玕萬林直須臾收拾到平淡雨洗高峯增老碧又如

摩詰盡思精一幅霜銷數拳石鬼神怪變露形狀天
地英華發骨髓我家江南謝眺山山深流水長潺潺
猕猴摘菓赴不去白雲常在衣裳間斷無車馬送塵
土獨與猿鳥期追攀一狂有酌醉復醉萬慮不到閑
中閑欲邀君去詠此景願窺巨筆追揚班其餘功業
未足數天馬安得趨塵寰

謝東城練尉

我聞武夷山迺是神仙府靈舟插峭壁異骨留深塢
有時風高月色靜天樂瑤淙散天宇飄飄秀氣鍾爲
人往往聲名邁前古練君頭角傑然竒少年折桂登

雲梯陸機才華恨羞澁相如詞調慙支離青衫一命
東城尉能使斯民歌愷悌鸞鳳肯與鷄鴛爭萬里雲
霄終自致東城煙水秋茫茫覽古高吟應斷腸白蛇
血濺赤龍劍八千子弟同時亡而今戰處無青草廟
門斜掩狐狸老群巫請雨搖銀刀滴瀝椒漿薦蘋藻
力拔山兮安在哉丹青壁盡空塵埃因君吟想不能
已孤鴈一聲山月頽

謝淮西吳提舉子中

瘦馬徐行三百里撲撲黃塵眼雙眯手携簿法趨使
臺惟恐瑕疵煩摘指藍衫感履走廊廡與坐撫循顏

色喜琅琅先誦荆州吟醉來捉住鯨魚尾如今無復
氣凌雲垂首低徊逐泥滓須臾又忘按察尊羅列壺
觴瞰池水圓荷翻風碧玉軟幽鷺得魚團雪起正當
煩暑浩如秋更聽高談清入髓君臣會合前世無朝
廷萬事圖新美甲花照日御營寒胡命懸絲朔風裏
自嗟雖老力未衰命未遇知甘墮死南山射虎竟殘
年不得封侯亦徒爾感君欲引西江波涸轍行將脫
螻蟻功名成就須報恩莫道江南無壯士

仲春櫻桃下同許損之小飲因以贈之

君不見古人悲歌愁殺人一片花飛減却春徑須沾

取就花飲暫時爛醉陶天真借令黃金大於斗豈買
人間百年壽但願青春永不歸更得滄溟化濃酒朝
酌弗乾暮傾弗竭東向浮桑採日枝西入瑤池浴明
月枯桐三尺安足彈重華去矣薰風寒夷齊恥食首
陽粟屈子徒佩瀟湘蘭意吁噫哉賢與愚同歸一死
胡爲乎共君極飲且爛醉指點世路皆虛無許損之
爾爲我滿斟我爲爾高歌相逢莫恨晚結交貴知心
坐看南山一片霧忽成千里萬里之春陰

再遊花山

去年來時春未歸枯林枳訝露老枝今日重來春已

去秀葉茂密藏黃鸝山家景物新換故世事塵埃朝
復暮白頭迤邐謝輪蹄青塚綿聯老狐兔令人歸興
如浮雲早向江山樂賤貧不須訪道赤松子朗愛鱸
魚并紫萼

酬蔡尉秘校

環峯雨過煙嵐披君醉兀兀騎驢歸明朝大字送蒲
篋乃是醉掃琅琊詩陽冰篆筆昔未有鐵索礪礪纏
蛟螭禹偁八詠不足數永叔爛漫鐫瑤碑山光水潤
洗出太古色更後敢作知為誰愛君膽大少且銳撓
剔缺漏筆補之飄然一別今七載取讀往往生光輝寧

知流落尚為尉瀟湘邂逅令人噦又致新章溢編楮
遣僕買酒烹黃雞伊予齒髮更衰落固異往昔相逢
時舉杯未盡輒醉倒眼吻雖強難扶持人生老去百
無益談新憶故惟傷悲勸君休吟亦勿飲榼株拘坐
真忘機死生終始了為一清風為我炎天吹

酬李從道太博

秋水浸天無表裏開帆已過三千里鸚鵡洲前逢故
人往事新愁還可紀祖朝熙熙民物好長憶聯車遊
五老鳥啼花舞送春歸倏忽官書滿三考從茲南北
趨塵勞往往遭嗤兒女曹斗筭之祿未能棄回首空

羨嚴陵高相逢彼此驚遲暮筆下琳琅寫心素荷花
十頃遶君家豈是荒榛礙歸路悲歌不覺青衫濕酒
杯未滿愁先入聞說明朝趨玉京直節如今恐難立
公擇鄂守學士三堂請雨
廟門斜開壓江浦紅裳小巫來擊鼓太守焚香令致
詞願駕蒼龍作霖雨三神鼎峙名謂何子胥范蠡馬
伏波圖經莫載碑字滅忠魂血食應不訛朝廷日夜
傳新令輔弼賢良元首聖陰陽調燮神相之忍使斯
民飢以病

酬魏炎秀才

碧雲暮合廬山頭夜蛩聲撼鄉園愁忽然一見舊遊
客貫酒不惜千金裘高談稍聽吐霄臆歛如野燒光
難收虎豹哀嗥走不徹獵網四面誰能搜嗟予慄慄
畏事者兀坐視子勞雙眸主人欣歡亟掃室鴈榻旋
列橫霜秋雨溪倒碧瀉明月松窓左右風颺颺長篇
贈我不可和和聲酸澁令人羞

和懶散贈胡公

胡公家在東園隅世族蕃衍今仍孤平生嗜酒少知
者請說懶散提携初杖頭世界迷日月豁然心地無
榛蕪人人未飲公輒醉坐日只與樽罍俱葦華開口

洩上旨毛穎禿髮非中書貪官雖得後乃辱智慮可
惜於身踈豈如胡公泛滄海不用鼓柁并乘桴蓬萊
頂上受玉液酣酣至樂忘榮枯劫火任滅公未醒不復
願進承明廬承明侍宴盡金玉君豈有意來相呼

月下獨酌二首

長空無雲江水淨月出東方掛金鏡我時有酒何處
斟破碎寒光借魚艇便邀玉兔乞靈藥一粒為醫天
下病玉兔既不報我亦醉不知舟人解事喚我起月
輪已轉西山西人間萬事不可了且與明月閑相隨
明月不解飲何事解照瑠璃鍾金波蕩漾使我惜不

徹一酌萬事逃心曾良時忍自棄聖代真難逢生平
不知耕與戰唯知猛飲大笑吟清風竹林七子豈足
數淵明五柳方途窮一身不為萬乘屈傲矣嚴陵垂
釣翁明朝官滿歸去來兮但願月輪不缺樽酒不空
吾君萬歲坐法宮四海長靜無兵戎

魏武廟

濡須山頭祠魏武炫轉紅裝按神鼓蘋藻盈筐酒滿
樽呼吸風雷激春雨田疇高下春雨平操牲飲福羅
中庭吞吳成魏遇歸晉血食猶叅社鬼靈

向舜畢秘校席上贈黃州法曹杜孟堅即

君懿職方之孫也

青天無雲日華滿小妓樓中吹玉管卷簾不信夜霜
寒熏蘭酌桂肌膚暖黃州之客最少年醉來口角傾
詞源驚龍掣電繞滄海沙場陣馬成功旋殿賜新袍
織春草水溢雙瞳犀插腦壯圖佇結明主知帶束黃
金應未老宣城憶拜乃翁時幕中珠履皆雄奇至今
名姓記僧壁當年已識麒麟兒嗟予老大日零落兩
鬢衰蓬眼生瘳寸心猶欲慕夷齊險路無緣攀衛霍
邂逅桐鄉逢故人槐槽瀉釀追陽春形容若畫凌煙
閣第一江南尋隱淪

懷青山草堂

三峯連延一峯尊龍山白紵如兒孫重岡複嶺控官
道北望金陵真國門淙流奔激洒河漢兩溪直接丹
湖源松荒檜老古佛刹鷄鳴春晚桃花村石崩廢井
謝公宅龜仆斷碣長庚墳斯人白骨已化土英氣往
往成煙雲我昔棄官結茅宇九品青衫安足數竹筒
盛酒騎白牛醉眠彫天與天語如何蹭蹬隨辟書十
年又向風塵趨只今南鬢滿霜雪功業不成思舊廬
山花解忘憂山鳥名提壺四鄰未必便棄我三徑荒
草還堪鋤馬泥田肥種秣稻紫莢異味美饒嘉魚盈缸

釀酒邀客飲林下散髮時時梳誰人繫尔不歸去自
問此心無乃愚

憶五松山

江南富山水忽憶五松山梁僧種松奪造物至今千
丈凌雲間上有寒蟾吐魄凝老声冰雪下有銅陵碧
澗傾潺潺雷公睥睨不可以揮斧老鶴飛來勢欲止
而復還猿猱側望何由攀琉璃殿閣若化出四天
之衆說法鳴金鑲我嘗脫屣往棲息六月清風無汗顏
濃陰可愛坐盤石綠酒酌盡橫琴彈命宮叩徵天地
變聽之以氣往往生羽翰紛埃不到佛淨國豈識人

間行路難塵勞忽起舊緣想倒騎匹馬來長安脩鱗
掉尾業已困涸轍孰與西江瀾髮踈齒缺形將殘畏
塗足躡心膽寒屈原懷沙賈誼貶身後忠名何足觀
不如宴坐碧山裏笑傲每携雲月歡明朝却欲渡江
去五松巖戶無人關方壺負嶠太殊絕幸有此山容
我閑

清明望藏雲山懷舊遊

憶昔清明出郊去藏雲寺前花正開蜜蜂銜藥異香
散時時洒面微風來溪泉甘滑碧玉色晴山倒影無
纖埃紅粉佳人十七八踏歌月唱歌雲鬢頰黃犢行牽

載酒瓮到處便傾三百盃或逢濃陰藉草坐口橫玉
笛吹落梅傍人問我樂何事我心無事同嬰孩誰令
束帶入官府觸網脩鱗難再回清明依舊好時節朱
顏憔悴無由陪藏雲之山亦非遠隔江東望青崔嵬
洛中王秀才談劉伯壽動靜慕其瀟灑

作詩識之

客來說劉翁嵩山跨黃犢青衣二雙鬢顏色若明玉
手携綠牙笛隨軒奏新曲倒傾酒榼松下飲旋開氈
帳雲中宿少年富貴老安閑自道此生無不足令人
慕高標神魄頓蕭爽何當插兩翼乘風一飛往永結
溟廣明朝未作嵩少遊且向江南結魚網

逍遙亭歌一首贈太守王君章

斯人交逍遙恣真賞長哦紫霞篇洞戶瓊瑤響胡爲
戀青衫壯節空飭髣塵埃一闕城郭卑波瀾萬頃滄
天壤俱盡手爭以丹青模大言得罪僅免誅斥叅軍
事來當塗傳云此地舊曾結廬百年荆棘遺荒墟公來
相址呼犁鋤雙亭化出瑤瑤鋪欄干闕角明青朱四

座瑩徹織埃無蘭芬麝裂陳墨玉珠履珊珊陪後車
東瞻宣詔西浮圖曉光夕景迷蓬壺愛公心畫如明
珠落成之樂政事餘爲公歌勸公醉留連亭上能幾
時行促星輶還玉陛

投獻省主李奉世密學

祖朝相國之真孫軒軒冠蓋宜高門拔身州掾入政
府議論挺特窮根源顏淵必用孔丘鑄自此聲名聞
至尊熙寧神化邁前古屢詔馳車外循撫大河之北
淮之壩民起疵瘵勇歌舞樞庭進直腰橫金君臣道
合同一心貨泉交匯指諸掌老吏縮手隨規箴如公

之才世希有突兀千丈輝喬林徐冠貂蟬坐廊廟重
見成王得周召泰山鏤牒天垂休却笑鴻蒙首頻掉
賤生流落何可言四十栖遲埋冗負涸鱗悵望一盃
水安用西江皓渺之波瀾願公吐和氣稍回巖谷春
養成赤寸木爲公車下輪它年青史上報德豈無人

俞俞堂寄鄂州李裕老

黃鶴樓南大湖側芙蓉深遶誰家宅云是裕老之宴
居高堂獨榜俞俞額春山拖翠入平簷夏竹引涼吹
廣陌秋江澄月天鏡開冬雪擁林崑閬白世間萬事
不掛心瓮撥香醪欣有客客來乎伴我飲不醉無歸

醉還寢問君欲達道遙鄉信哉天地真衾枕覺來何
物能解醒試作琵琶打面聲俞俞和氣浹四體安用
辟穀求長生君不見鸚鵡洲前殺祢衡三赤椀杖當
雄兵才名誤身不自覺恬淡晦迹無人爭南北相望
二千里夢逐高帆逆秋水爲翁持酒聽翁歌衣濯黃
塵眼除眯

青山集卷第三

青山集卷第四

當塗郭

祥正字功父

長句古詩三十一首

前雲居行寄元禪師

憶雲居乃在匯澤西南脩川之隅山盤盤兮石門屹
立磴道絕飛瀑萬丈淙冰壺雲沉沉兮方晝而忽暝
古木交錯兮藏魁魁攀崖欲上復自止投險却憶騎
鯨魚崖回時復造平野絕頂乃有百頃之膏腴群山
下瞰若聚米殿閣枕藉非人區露華洗出太古月桂
子搖落陰扶踈清風欲借羽儀展穢念頓覺秋毫無

老禪底事不度我紅日東上還驅車如今正似武陵
客放舟已遠嗟迷途青春一往二十白雪漸變千
莖鬚西來忽遇歸飛鳥青紙遠寄黃金書靈茶香味
勝粉乳滿篋所贈過瓊琚玉川七椀喫不得灌頂未
識真醍醐南暹北訥惜已死唯師秀出孤峯孤潛深
隱密自得所豈不憫我棲榛蕪倒影射巖猶入石異
日三椽容野夫

後雲居行寄和禪師

我所思兮歐山之顛白石蒼木蔽窺而隔世兮路通
乎兜率之天層樓複閣觸峙絢爛往即造兮雲渤興

而澶漫徙倚恍惚若奪吾魄兮聊扞睫以盤桓徐風
生而霧散卷綃縠於林端泊天清而日上兮瀑峻飛
而潺湲畜而爲潭泄而爲澗運之以車兮盈乎大田
然後度石橋登重門睹篆王之榜謁金仙之尊徒衆
五百龐眉皓首形儀靜而不雜兮語言要而不煩齊
興止以鍾鼓兮善後先而靡難舉正眼而諦瞬兮了
無一法之可觀寂兮樂兮妙復妙兮其惟真如之禪
我請弃冠釋帶以投依兮師則指乎未契之緣於是
曳屣却步循磴道而復返兮歲眇眇而屢殘觸網羅
以系累兮方傷羽而戢翰悵昨遊而欲再兮庶已創

而復宇亂曰疇將歸兮卧龍之室依大道師成佛而出

贈潛山伊居哲先生

伊君頭戴星文冠遨遊五嶽何時還結茅却在潛山
裏閉息自養丹田丹聞說年齡七十九髮如鴉青亦稀
有生平讀盡道藏書寓興成詩僅千首清風生我太
古絃彈罷時傾一壺酒門前手植數本松看爾凌雲
比予壽高奔日月瞻玉京陰氣鍊盡陽氣成行聞北
帝呼六丁紫書下詔鸞鳳迎潛山空留千載名白雲
不斷溪長清

贈桐城青山隱者裴材

青山為主身為客主人借客青山宅白雲自在千里
飛長松不換三冬碧藤枯誰與寫作龍龜老何年化
為石落花隨水眷深源鳴鴈過江悲晚色家無妻子
心無累頂冒寒霜踵藏息月明舞影聊盡歡一點塵
寰不留迹儻來軒冕真可嗟朝為公卿暮遭謫屈原
賈誼尔為誰問君何似青山客

寄劉繼鄴秀才

憶惜重遊樂尋春之宛陵天機織出萬山錦虹橋倒
影銀河明游絲縈空白日暖好鳥亂響清風生疊嶂
樓中索美酒坐上客子皆豪英諸姬合雜奏絃管一

人妙唱為井瓊玉板斜開厚冰裂鴛鴦索拍秋波橫
酒盞貪歡不知數夢入瑤池逃宿醒誰知一別萬事錯
荷衣倒着來江城青雲散盡落青野長絲掣斷無長
鯨鄉山好在却歸去當共故人吟此情

題杏山阮氏高居

仙翁得仙朝玉皇當時種杏盈山岡傳聞落英堰流
水每到三月溪泉香白雲霏霏出幽谷獨鶴沉沉唳
喬木寒潭深處睡蟠龍靈草芳時躍青鹿丈人何年
居此間說說孫子如芝蘭抱才求進十五六亦有隨
計鄉書還步兵微世逸千載誰道風流至今在軟炊

玉粒烹黃鷄客子雖多竟相待我愛長吟登好山到
此便欲辭塵寰可能築室輒延我為君鍊熟黃金丹
丹成大笑分一粒坐令綠髮回朱顏浮生百歲不早

悞日月擾擾空循環

杏山葛洪種杏煉丹之地

銅山寺

田塍行盡蒼山轉溪水滔滔晴曝練馬蹄怯石鞭不
行十步九蹶令人倦黃昏到寺亟就榻山僧苦來邀
我飯香粳新炊野菜肥一飽令人百憂散篆香欲盡
象燈暗林聲敲敲苦霜霰暫來福地能清虛何用致
身居諍諫

隱靜寺二首

門橫大溪溪淨碧人不捕魚魚穩潛哀猿長嘯霧務垂
地飢虎一聲風動簾金僊像古苔蘚剝鐵磬夜敲規
矩嚴道師達性傲時輩不信書生來養恬
碧霄峯下車輪停道師未返誰逢迎山雲着地雨正
急春水滿田人不耕飢虎嘯風大石裂倦鳥喚鷄深
澗鳴客心欲去且復止坐飽香飯餘何營

浮丘觀

仙翁得仙二千載滄海變田田變海浮丘却接番禺
西躡跡篙痕至今在朱明之門敲不應荆榛滿地誰

重興史君舉意要卜築樓觀矗雲如化城李白騎鯨
下蓬島嫦娥洗月來滄溟相逢且勸百壺酒蟠桃結
實何時成史君自有神仙骨往往前身尋舊物手探
樹穴求玉環肩拍洪崖猶髣髴更提椽筆揮長篇至
理直欲追玄元行當跨鳳返金闕回首番禺空紫煙

明皇十眉圖

明皇逸事傳十眉正是唐家零落時霓裳曲調雖依
舊阿蠻終不似楊妃畫工貌得非無意欲使流傳警
來世翠翹紅粉尚爭春隱約香風起仙袂六龍真馭
竟何之秦陵荒草長狐狸空將妙筆勸樽酒醉覺人

間萬事非

九疑山圖

噫吁噉九疑山色何雄竒坡陀詰曲不足狀九峯萬
丈排天靡蘄蘄儼若九老坐乾顛坤弱能扶持崖回
時復見華屋原本旋有山經題白雲綿聯芳草歇拱
木夭矯狂風吹上有源源不絕之寒泉下有泂泂不
斷之深溪初疑青銅照碧落忽見雲漢飛虹霓丹青
畫出尚如此而况高步窮嶇嶠或云重瞳一來不復
返二妃血淚班竹枝惜哉不經孔子辨後世誰能公
是非堯非幽囚舜不野死堯崩民如喪考妣舜非遊

仙而幸此群猪聳耳聽童子遊人擊掌之變風雨見豕
負塗聖所惡仙人護之亦何補我知神仙術已卑但
愛此山雄而竒背圖南望未能到高吟盡日長吁噉

魏中舍家藏王摩詰海風圖

只聞王公畫山水未識王公滄海圖魏侯矜誇我家
有取出十幅堂中鋪誰知東海群龍力神妙能以一
筆驅洪濤翻天雪成隴黑分雲霧藏空虛高低數寸
折萬丈勢以意會無差銖却嗟流傳數百載絹素何
以當涵濡王公之心壯莫比其工欲出造化初惜哉已
死不復得悵望盡日將何如魏侯魏侯重藏秘直恐

變化成江湖我歌不足徒嗚呼

王元常家藏鍾隱畫三害圖

老鍾筆法何奇古三害精靈一圖聚周生自握蒼精
龍白額長蛟甘喪沮危橋跨水壓波濤巨木翻風暝
煙霧挺然獨往知忘軀敢謂誅邪天地助三日生還
動閭里千載遺蹤存絹素薄蝕已更人仰之自古賢
豪遺細故何獨今人無此人已覺丹青有深趣江南
印璽尚如新國破倉忙畫誰付一圖分裂藏三家離
合悠悠歲時度只今皆屬丞相孫掛向高堂邀客顧
倏然風雲駕霹靂雨來平地銀潢注珍綺收藏卷不

徹直恐變化復入江湖去

燕待制秋山晚景

王荆公有
詩跋其後

我朝妙畫能山水燕公筆法精無比燕公山水工平
遠一幅霜綃折千里瀟湘洞庭日將晚雲物蕭蕭初
滿眼虞帝之魂招不返霜樹冥冥紅葉卷二妃血淚
知幾多竹上遺痕深復淺漁舟片帆風已滿漁父橫
眠思猶懶時時白鷺聚圓沙亦有行人下前坂江回
岸斷數峯青髣髴靈妃曲可聽却逢深崦見茅屋
只欠桃花如武陵世間何物人爭詫請說奇書并妙
畫一時鑒賞安足論流轉千年愈增價玆綈十襲藏

至珍卷尾長篇更入神嗚呼粉墨終成塵唯有文章
道德能日新

夏公酉家藏老高村田樂教學圖

高生妙畫世所知君藏兩幅尤瑰奇春回老柳未全
綠和氣盎盎微風吹負暄當案誰氏子坐以訓誥傳
童兒麻鞋破穿十指露紵衫短袖烏巾歌眼吻開張
手捉筆叱怒底事揚其威兩童重分爭迭相挽彼二稚
子傍觀窺一童獨卧守書卷性習已見分醇醪皤然
老叟醉兀兀二孫側立猶扶持餘皆伶官雜村妓插
笛放鼓陳威儀三犬奔來吠欲齧二人驚顧方攢眉

伶家有子少亦黠兩手據鞍驢載之尊卑向背極精
妙精妙得以意思惟田翁豐年固取樂又能教子勤
書詩德澤潭濡賦歛絕致我鼓腹咸熙畫工亦畫
太平事誰欲擾之生亂離高生高生不獨愛爾之妙
筆對此頗思三代時

寂照大師畫藏相國寺壞壁秋景

京城車馬多塵埃一見妙畫心眼開深山老木秋思
靜苦霧鬱鬱鬱諸峯埋客騎寒驢打不動懊惱似憂寒
雨來崖平路轉斗然絕筆力未斷空徘徊胡為皴剝
僅盈尺鏘以大篋過瓊瑰師云昔是殿堂壁治平大

水餘皆摧恰如盧仝玉碑子中路撲折令人哀玉碑一
折乃無用此畫雖缺猶堪裁君不見山前路路長不獨
憂風雨前有毒蛇後猛虎磨牙矯尾藏深塢聖人皇
皇嗟逆旅畫工意思非無補非無補誰信之紛紛門
外誇輕肥

泗水雍秀才畫草蟲

蜻蜓點水蝶撲花螳螂捕蟬蜂趁衙營營青蠅爭腐
糝趨趨阜冬蝨沁草芽徐生骨朽不復得雍子筆老誰
能加卷開却掩恐飛去綈龍襲愛護行隨車况君才力
曰清敏胡不放手為龍蛇龍蛇逼真看騰躍出入天

地藏煙霞

謝冲雅上人惠草書

上人胷腹包琅玕醉日睥睨臨冰紈墨池頃刻波瀾
翻虬龍尾尾垂雲間搖曳天矯若可攀霹靂轟奔電
火騫卒章雨雹霏漫漫瀕洞恐懼坤軸掀白沙縱橫
仆鼉鼉屋漏壁折安足言鳥鷲出林避彈丸斗高復
下騰脩翰朽木欲折枯藤攢逸興不顧長毫乾客如
堵墻爭縱觀詎知聖畫吾臯端黃金論斗珠走盤數
字不售尤為難爾嘗愛我說玄理為我落筆動盈紙
張顛懷素嗟已矣上人之書無與比

謝鍾離中散惠草書

丈人行草天下無體兼衆善精神俱少年弄翰今懸
車一幅不博千明珠墨池翻瀾化鯨魚老木半折脩
藤枯霜天一陣來鴈鶩荒陂數點眠鷗鳧換鵝瘞鶴
雖已矣折釵劔舞成須臾心通造物乃神速伯英懷
素真其徒迺來作我醉吟贊寶藏二妙歸江湖要將
垂法數百載摩挲青玉親傳模丈人善吟仍善弈名
譽豈止專能書名譽豈止專能書皎如浩雪盈冰壺

謝蔣穎叔惠澄心紙

李氏三世皆名書古今筆法誰能如澄心堂中畜妙

紙敲冰搗楮惟恐麓當時文物稱第一教勅往往親
涵濡赫然真龍躍中國僭迹甘就雷霆誅論功行賞
盡金玉唯有此物多贏餘流傳既久乃珍絕一軸不
換千明珠樂安御史輒寄我二十五幅無纖汗却疑
織女秋夜醉素段割裂天所須又如美玉繞出璞瑩
采射目爭陽烏文章未到一王法寶紙謾對明窓鋪
廷圭煤麝銅雀瓦氣象律光尤相於坐思厚貺欲為
報累句安得論錙銖况君才力似韓愈盡當返贈誅
奸諛

謝餘干陸宰惠李廷圭墨

集仙昔與文忠遊文采聲名喧九州鯤鵬未化忽捐
翼地老天荒雲海幽篋中嘗秘上賜墨仁宗所賜李廷珪墨紫金
泥印雙脊蚪名題庭珪姓氏李此物未省何年留紋
如堅犀刮不動鏗鏗觸硯蒼煙浮蜀牋洒落黑勝漆
欲論所直真難酬麟兒字法肖家學珍綈寶匣深藏
收并刀截斷輒分我始信明珠今暗投嗟予吟筆久
已閣辨舌倒卷剛腸柔書陳北闕上印紱志樂南畝
親勸耨得君賜墨竟安用捧翫反覆增予羞况君綠
髮眸子瑩才業自副朝廷求研磨煤麝染諫草抉摛
世病蒼生瘳名成功遂取上笏世閔光焰垂千秋莫
如老鈍默將死再拜謝貺長江頭

謝李公擇惠妙墨二餅

南山采松節北山割麝臍燒煙掃煤和去膠漆篆記

歲月形蛟螭集賢學士久珍玩云初得自扶桑枝李得

於宗室張翁所作又精絕磨刮不動猶堅犀鄴臺古瓦

汲水試黑雲隨手生冰池况君學術老益富六經秘
法窮無遺明牕靜机列毫楮而與此物真相宜草玄
著就垂萬世忠厚自任陳安危嗟予吏役久零落至
寶暗贈寧非癡嗚呼大禹已往不復見一赤渾厚疑
玄圭

謝王公濟節推惠硯

歛溪之仙洗山骨一輪琢出秋潭月摩挲清潤無纖
痕不學寒光有時缺玉川輒莫憂蝦蟇縱爾齧吻何
由齧陰天着手泉脉生三伏臨之冰去聲炎熱又如
明鏡當時窻對面森森數毛髮端江品格直頑賤鄴
臺片段多皴裂中山有客先得之獬豸我冠寫忠血
竄身南過洞庭湖覆舟幾葬蛟龍穴君今贈我誠謂
何自愧閑官非補闕松煙和漆法廷圭玉兔長毫妙
諸葛敲冰搗楮出烏田四物收藏豈虛設乾坤俯仰
存赤心誅貶奸諛佑臣節獨刊五傳扶春秋肯趁時

文校工拙更衰更老心更堅與硯相將不倉卒

謝方彥德奉議惠羅文硯

歛溪古源鑿龍尾一片寒冰瑩無比珍綈藏護知幾
年贈我題詩草堂裏驪珠失色悲暗投再拜置之括
木几硯兮不似在君家捧來自有纖纖拍

中秋泛月至歷陽訪太守孫公素

中秋挈輕舟西泛采石月初疑擢碎冰壺冰又如飛度
雪山雪若非身世出塵寰底事清光透毫髮表宏謝尚
久磨滅含情欲就何人說歷陽太守孫公素竹冒寒
霜松屈鐵昔從赤縣守儀真再上天門請符節紫皇

詔長雞籠仙惠浹春陽威凜冽開倉出粟賙民饑夜
戶不扃無竊發咄哉此事安足論斯人自養班憂高
且聞兵厨醞濃酒桂子秋香月中有請君置我三百
盃我爲君吟一千首爐鎚七竅空混沌能使頽齡遂
長久飢橫鏝鰓鯨肉渴引明河傾北斗憑誰爲問
陶淵明胡爲種菊仍栽柳豈如永夜無纖雲江光月
色鋪黃銀喚取三千珠履客陶然一飲情無垠劉項
輸羸亦安在笑殺今宵月下之醉人

二月十一日倪倅敦復小園留飲

殘梅零落同寒灰屏翳忍驅斜雨來濛濛點滴夜連

曉園館寂寞生青苔墨雲四卷山露碧日轂照耀天
衢開妖桃映竹煙醅酊細柳拂水風徘徊倪公要我
共行賞小亭草草排樽壘盈筐菊芽青玉軟滿盤鱗
縷紅絲堆興來一笑且爲樂春光半被鷓鴣啼催百年
已往五十八借問餘生真可咍平原豪客散煙霧東
山舞妓埋蒿萊眼前不肯飲五斗身後安能傾一杯

和州連雲觀留題呈太守王純父

連雲之觀何寥廓碧瓦危侵天一角深排柱礎貫九
江返掛簾鈎吞五嶽風檣北去煙溟溟鴈陣南飛秋
漠漠白衣每從欄下回金盆正在簷前落蔡公書榜

妙入神劔戟縱橫挫予樂主君自是蓬萊仙分符暫
與民同樂卷舒當爲天下霖一釣能令六鼇躍滕王
庾亮尔何人回眎規模太卑削我從姑熟飛輕舟欲
陪珠履登斯樓與公酣歌相獻酬蘭亭俗飲安足求
手搖麈尾拂斗牛爲君千載揚風流

謝歷陽王守惠新釀

卓犖英才歷陽守年來不得音書久隔江知我巖戶
寒赤泥封送兵厨酒碧玉壺黃金斗雪樹雲峯作賓
友爲君一醉歌陽春空山霹靂龍虵走只愁君返紫
皇家西望連雲謾搔首

寄歷陽張宗孟隱士

歷陽張君心好古冰不爲寒葉非苦我欲見之波浪
阻安得鄰巢接飛羽百年營營竟埋土進退趨趨亦
何補今歲秫田收幾畝爛醉高吟餘不數

送余秘校

蒼山凍雲猶未消君騎瘦馬來飄飄入門下馬與我
語琅琅滿室鳴簫韶一官初得遭猛守十年困辱朱
顏凋恨無田園即長往醉卧白日歌唐堯去干斗粟
活妻子誰念塵滓汗瓊瑤相逢太息不能已解衣貰
酒愁魂消紅梅零落雪霜洗蒼鴈蹭蹬狐狸驕男兒

功名顧有命太公七十方漁樵否極泰來如覆手闊
步自此凌煙霄側聞丞相開東閣肯使斯人重折腰

青山集卷第四